

Izveštaj sa XVI sjednice Općinskog vijeća Ilijaš

Dana, 27.02.2014. godine održana je XVI sjednica Općinskog vijeća Ilijaš.

Na dnevnom redu našlo se 14 tačaka.

U sklopu vijećničkih pitanja i inicijativa donesen je Zaključak kojim se zadužuje Služba za prostorno uređenje i stambeno-komunalne poslove Općine Ilijaš da u saradnji sa Direkcijom za ceste Kantona Sarajevo razmotri postavljanje sigurnosnih znakova ili ležećih policajaca na dionici magistralnog puta R-444.

Općinski načelnik je istakao u Izveštaju o realizaciji zaključaka sa 15. sjednice i tematske sjednice Općinskog vijeća da sve što je u nadležnosti Elektroprivrede i Elektrodistribucije u fazi realizacije, a što se tiče Elektroprenosa na adresu Općine je stiglo pismo u kojem se navodi da je planirano projektovanje trafo stanice u 2014. godini, u 2015. godini njena izgradnja te puštanje u rad 2016. godine.

Vijećnicima je prezentiran Izveštaj o radu načelnika i općinskih službi za period 01.01.2013. godine – 31.12.2013. godine. kao i Operativni plan načelnika kojim su utvrđeni i definisani projekti čijom realizacijom će se prije svega nivo izgrađene infrastrukture podići na još veći nivo i započeti izgradnja nove, što će uveliko poboljšati uslove života stanovništva općine Ilijaš u svim njenim djelovima, najveća poboljšanja treba da se dese u društvenim djelatnostima a posebno u sektoru obrazovanja. Također, planirani su značajni projekti u stvaranju uslova za povećanje obima i kvaliteta pružanja zdravstvenih usluga.

Rokovi realizacije nekih od projekata biće uslovljeni aktivnostima nosilaca, finansijera i implementatora projekata, prije svega Vlade Kantona Sarajevo i njenih nadležnih ministarstava i direkcija, Humanitarnih organizacija i investitora. Važno je napomenuti da će se realizacijom projekata definisanim u oblasti privrede i poljoprivrede, kao što je nova Industrijska zona Luka, stara Industrijska zona Željezara, CIPI Stari Ilijaš i pilana Srednje stvoriti ambijent i uslovi za novo zapošljavanje i ekonomski napredak općine Ilijaš.

Sa 17 glasova za usvojena je Odluka o davanju saglasnosti na Program mjera i ušteda sa socijalnim programom za 2014. godinu kojim je predviđeno smanjenje:

plata uposlenim u organu uprave za 5%, vijećničkih paušala za 50KM, smanjenje naknade predsjedavajućeg i dopredsjedavajućeg za 50,00 KM, smanjenje paušala za Savjete MZ za 50KM, izdaci za informisanje u iznosu od 3.200,00 KM, PTT i telekom usluge u iznosu za 5.000,00 KM, Manifestacija "Ilijaški dani" za 5.000,00 KM, transfer političkim partijama 5.000,00 KM, Aplikacije načelnika 3.000,00, subvencija JKP "Vodostan" za 16.800,00 KM što podrazumijeva smanjenje naknada upravljačkim strukturama za 20% i smanjenje plaća uposlenicima za 5%, Transfer JU KSC i Radio Ilijaš za 6.000,00KM što podrazumijeva smanjenje naknada upravljačkim strukturama za 20% i smanjenje plaća uposlenicima za 5%.

Socijalni program: Socijalni paket za najugroženije kategorije u iznosu od 60.000,00 KM, privremeneo stambeno zbrinjavanje najugroženijih kategorija u iznosu od 13.000,00 KM, Prijem volontera – šehidske porodice i druge socijalno ugrožene porodice u iznosu od 15.000,00 KM, Stipendije socijalno ugroženim u iznosu od 10.000,00 KM, użine za djecu u socijalnoj potrebi u iznosu od 12.000,00 KM. Program Zapošljavanja: Zapošljavanje nove budžetske linije – Podsticaj za zapošljavanje za finansiranje Programa – Stručna priprema za posao za poznatog poslodavca udruživanje sredstava sa Zavodom za zapošljavanje FBiH) i drugih programa iz ove oblasti.

Prijem novih uposlenika u JU KSC i Radio Ilijaš i JKP "Vodostan" Ilijaš vršiti isključivo na bazi transparentnih konkursa i oglasa koji pored zakonskih kriterija moraju imati i naglašene socijalne kategorije.

Većinom glasova usvojena je i Odluka o uslovima, načinu kandidiranja, održavanja izbora i dodjeli mandata u mjesnim zajednicama kao i Odluka o provođenju izbora u mjesnim zajednicama kojom je predviđeno da se izbori u mjesnim zajednicama održati u subotu, 12. aprila 2014. godine. Izbore

će provesti Komisija za poslove mjesnih zajednica i saradnju sa drugim općinama i gradovima Općinskog vijeća Ilijaš.

Jednoglasno su usvojene i Odluke o prestanku statusa nepokretnosti u općoj upotrebi, kao i Rješenje o razrješenju zamjenika predsjednika Komisije za kulturu i sport, kojim se zbog bolesti razrješava dužnosti zamjenik predsjednika Komisije za kulturu i sport Fikret Fazlić, na zahtjev Općinskog odbora SBB-a BiH, Ilijaš, a za zamjenika Komisije imenuje se Mahir Brkić kao predstavnik SBB-a. Usvojeni su i prijedlozi rješenja iz imovinsko-pravne oblasti.

Informacija o dodjeli općinskih stipendija za učenike i studente u školskoj 2013/2014.godini, Informacija o stanju kriminaliteta, javnog reda i mira i sigurnosti saobraćaja na području općine Ilijaš za 2013.godinu i Informacija o radu Službe socijalne zaštite općine Ilijaš za 2013.godinu primljene su k znanju.